

RAMÓN CABANILLAS ENRÍQUEZ

ELADIO RODRÍGUEZ GONZÁLEZ

A SAUDADE NOS


POETAS GALLEGO

REAL ACADEMIA
GALEGA
A CORUÑA

F-3013

Biblioteca

A CRUÑA
—
TIP. "EL NOROESTE,"
ANO 1920



8342
A SAUDADE
NOS
POETAS GALLEGOS

1
1242159
05 autocars
donación 01/12/1987

A Cruña: Tip. EL NOROESTE. Año 1920

A SAUDADE NOS POETAS GALLEGOS

DISCURSO LIDO POR

RAMÓN CABANILLAS


O DÍA 31 DE AGOSTO DO ANO 1920, EN QUE
SE CELEBROU NO BALNEARIO DE MONDARIZ O SEU
RECIBIMENTO NA

REAL ACADEMIA GALLEGA

E CONTESTACIÓN DE

ELADIO RODRÍGUEZ GONZÁLEZ

SEGREDARIO DA ACADEMIA



DISCURSO
DE
RAMÓN CABANILLAS



Señores Académicos:

Somentes El Señor, que sabe como
é de cativa e pedruguenta a miña hor-
ta secana, está ô tanto do meu suar a
fio no medio das uces bravas e dos
carrascos rateños, arredando fentos
e toxos, en precuro d-unha rosa lve-
laiña que ela fosel co-a que presentar-
me diante de vós a cumprir a miña
oferta, a faguer o pago, obriga de de-
reito e devoción do costume, d-este
foro espiritual no que somos rendeiros
cantos vemos honrada a nosa probeza
por mercede da vosa cortesía fidalga
e da vosa bondade acariñadora, c-o
agasallo prestixioso d-un asento ô lu-

me no fogar esgrevio onde se ergue,
sempre acesa e alumeante, a fogueira
sagra do más enxebre amor á Terra,
o amor que limpa e vela os groriosos
saiates remendados dos inmortaes pe-
legrinos do noso Ideial e as batidas
armaduras, que os séculos cubriron de
poeira, dos seus nobres e valentes ca-
baleiros, o amor que se axoenlla dian-
te das pedras de santidade que nos cu-
mes e nos vales, nos mosteiros e nos
pazos, nas ermidas sinxelas e nas so-
lenes catedraes, cantan o esforzo de
unha raza, o amor que abrillanta e pu-
le n-un traballo escuro e silenzoso,
mal agradecido cando non dado a es-
quecemento, os decires mainos, os be-
rros pregantes e bruadores, as verbes
milagreiras da nosa Fala, d-esta Fala
voadora que sabe como ningunha das
inquietudes segredas, das tristuras fon-
das, dos amores mimosos e saloucan-
tes, das divinas saudades vagorosas...

Caviloso e sin acougo, que enriba de trafegos obrigados traguíanme as horas súpetos dores neboentos, desmaiaba na cubiza e no rebusco cando unha alma compasiva, irmán n-estas arelas de retrauto e renacencia que fixeron niño nos peitos xenerosos da mocedad da patria, puxo na miña man «Os poetas lusiadas», de Teixeira de Pascoaes; páxinas novas ás que agardan días de eternidade, libro tocado da gracia e frorecido, como unha roseira de milagre, en rosas de todo tempo.

Abreuse o meu corazón a un sentimento docísmo e lumioso, e namorado do seu feitizo esgallei, pecador, unha ponliña da roseira. Pranteina na hortiña probe das uces e dos toxos, caíron sóbor d-ela as raiolas douradas do Pasado, bicárona os ventiños leviáns do Porvir, regueina co-as augas cristañas do noso lirismo orballado de bágoas, e na ponla callou un

pensamento, rosiña de cores pálidos
e recendo velafño ¡tal o xardineiro!
que vén a decirvos, homildosa, cómo é
de fonda no sentimento e de antiga no
blasón a saudade nos poetas gallegos.

* * *

Frór de lembranza, ô abrirse diante
de vós, tén de deixar caír a más aru-
mada das súas follas, en oferta sagra
de admiración, à memoria benamada
de Don Xosé Salgado Rodríguez, o
gallego escrarecido que chamado alá
arriba, a más outo asento no rueiro
olímpico dos nosos inmortaes, deixou
valeiro n-este nobre Istituto o que a
vosa mercede me donou. Poeta de sau-
dade, prisioneiro da sinxela meiguice
d-aquel currunchiño do noso chan, que
bican as auguas faladoras do Ulla sa-
loucante e do Umia ridor, no fio de
pelras que teceu co-as súas rimas loce
a primeira, con soave e docísima cra-

ridade, aquela en que encerrou todo o sereo encanto da cibdade de Arousa e da ría de ensono na que se espella; e antre o feixe frorido dos seus traballos de fina labra, que se agachan nas follas amarelas dos antigos xornales, terán vida louzana os artigos evocadores en que arrincou do esquecemento a groriosa e vella historia dos mosteiros de Cines, de Carboeiro e de Moraime, honor e gala dos fillos de San Benito nas terras prelaciaes de Santiago. Bendizoado antre os bos e xenerosos, ô percorrer dos tempos, na edade de frorecimento que se aveciña, o libro recollerá, cubríndoa de loureiros, a súa labor de enxebreza e namoramento da terra en que naceu.

Reconocimento e siñal de más outa loubanza que a patria lle debe, quede eiquí esta folliña de recordación saudosa.



Cando a branca pombiña do noso Sant Graal, mensaxeira da Espranza divina, baixa do ceo lumioso a renovar o Misterio, chega tamén arelante e cubizada de apagar na terra,—onde deita en silenco a fonte da Lembranza,—a súa sede eterna de renacencia e creación. Este é o sinificado místico e milagreiro da Saudade.

Voando más pol-o baixo, a Saudade é a força creada, en remanso, do Recordo e a força creadora e puxante da Espranza, superadas no tempo; o Pasado e o Porvir, a Evocación e o Deseio, irmados n-unha fervenza relixiosa, camiñando pol-as ribeiras do Misterio en precuro d-un máis alá de arelas do corazón e da intelixencia. Cubiza do lonxe, presentimento do que está para chegar, arela d-un ben perdido, lembranza d-unha luz que nos fireu na vaguedade d-un soño, desasosego de encadeado, inque-

dade do que loita por abrir as aíñas para camiñar pol-o azul, a saudade é o sentimento consustancial co-a nosa alma gallega e o molde que dou forma ó noso lirismo.

Añón e Rosalía chamáronlle *soidade*, a modo dos cancioneiros e d-El Rei Don Diniz de Portugal, Pondal dixo *suidade*, e Lamas, que nomeou un dos seus libros «Saudades Galle-gas», falou tamén de *soedade*, anque sin dúdiba no sinificado de saudade:

¡Ay, qué martirios sofro na terral
¡Ay, qué soedades tan fondas teño!

O enraizamento da palabra é fondo. O do sentimento está na freba das almas e dos corazós.

* * *

Anque a saudade pelegrina por todolos camiños do Arte, e a Música é

sempre saudade esgrevia, o más outo
cume de expresión e de nobreza adi-
quíreo na Poesía. A alborada, hino de
adoración a El Señor na súa gloria,
o mesmo que a cantiga da calandria
voando en circos cara ó ceo, envol-
veita na dourada craridade dos raios
de sol nacente, é a Saudade-Lembran-
za saíndo ó encontro da Divinidade,
e o alalá, tristura de amor de amar,
pregado á bocanoite, namentras voa
no vento que se dorme o tanguido
solene e vigoroso das campaíñas que
chaman á oración, o mesmo que o
reiseñor namorado praguendo seus
queixumes ó luar, antre o recendo do
laranjeiro frorecido, é a Saudade-Es-
pranza abrangundo n-unha aperta de
amor o Recordo que a enxendra; mais,
a Poesía, por riba de todo eso, é a
ollada misteriosa con que a alma ve
e sinte a Beleza do íntimo, a do fon-
do segredo das cousas, e a voz mila-

greira que di o noso sentimento diante de Dios.

* * *

Pol-o que fai á nosa poesía, é de tal maneira e en tal medida filla da Saudade, que ben se pode xurar que si a alma gallega non estivera tecida c-os seus fíos, Galicia non tería poetas. O noso lirismo vive na verba saudade como n-unha boliña de cristal, prisioneiro de encantamento.

A súa executoria arrinca de vello. Viva e latexante, acesa e arumada, barbulla xa nos beizos bicadores dos nosos docísimos troveiros medioevaes e amóstrase, logo, crara e lindamente dibuxada, dende os comenzaos d-este consolador rexurdimento dos nosos días, nos poetas xuzgados como precursores.

Tan noso é este lirismo, que os que

nos miran de lonxe, sin decatarse da virtude segreda d-esta saudade vago-rosa, escada das nosas arelas e cabe-zal dos nosos soños, fai tempo que andan perguntando si a gaita gallega rí ou chora. Somentes a ollada serea de don Miguel de Unamuno axexou un istante, ô través do velo sagro que cobre o noso altar: foi él o que dixo que dos mesmos verdores da nosa campía, ridente e garimosa cando se mira de pasada, surde, n-un són acom-pasado, unha queixa resiñada e mi-mosa, porque estas terras do poniente da Europa, estas terras de Irlanda, de Bretaña e Galicia, onde viven os pobos célticos, con gaita ou sin ela, estanse sempre queixando, c-os ollos cravados no mar, onde parece que se lles perdeu algo, algo que él sospeita que é a Atlántida afundida no miste-rio das augas. Escoitade o docísimo sentimento, as verbas elexíacas que

lle arinca a contemplación, saudosa
diante da Saudade, das nosas rías:
«Ese mar, que alí se agacha, antre os
brazos verdecentes da terra ¿non é
que precura n-eles un ben lonxano
que chora perdido ou o maino esque-
cimento dos seus dores tormentosos?
Alí, a carón da súa dona eterna, dor-
me e soña. E poida que arele tornar
a ser río, río homilde, recollido e re-
mansado; poida que soñe c-os seus
días de neno. ¡Quén sabe! Tal poidera
ser que aquela meiga ría de Arousa
esteia soñando c-o Ulla que lle rinde
as súas auguas, c-o probe Sar que
cantou a probe Rosalía. Todo elo non
é máis que unha sede; a sede que tén
o mar das doces auguas dos ríos que
baixan dos cumes, aquela sede devo-
radora, nunca apagada, que Rosalía
sufreu...» Velahí o deseio do retorno
à edade primeira: ¡O mar quere ser
río...! Velahí a espranza insatisfeta:

¡A sede eterna das auguas doces...! Forza invencibre do Recordo e divinas arelas da Espranza divina, que xa que Dios é a nosa eterna Espranza, tocada tén de estar de divina virtude a súa filla máis nobre, a divina Saudade!

Reparemos na súa sagra labor. A Lembranza, esto é, o tempo espindo os feitos da materia apodrecida, limpándoos do lixo terreal para arrincarles a barrenta figuranza e trocalos en visión resplandecente, en Beleza radiante. E a Espranza vestíndoos de azul estrelecido, erguéndoos no espazo, cubríndoos de Infinito e de Eternidade.

* * *

De Teixeira de Pascoaes son estas verbas xustas e nobres: «O Portugal de Camões, a Galiza de Rosalía, a

Catalunha de Maragall são os Reinos da Saudade». Con Teixeira, Unamuno; antre os nosos, Viqueira e Risco; cantos afondaron na nosa alma, téñenlo por certo.

Mintan o que queiran os ollos enganadores, o corazón dinos ós gallegos que o Miño non é un río que sopara sinón unha ponte de amor que abraza e que axunta, mais é do caso siñalar unha levián diferenza que se atopa antre a saudade portuguesa e a saudade gallega. A saudade da outra banda do río é mesianista. A arela de rexurdimento e redención de Portugal voa ó longo das ribeiras da patria en axexo da volta do Encuberto. O Deseio encarnou: Don Sebastián, na frase velida de Teixeira, é o *corpo heroico* da Saudade. A nosa, por riba de todo, é Saudade da Terra, Saudade do fogar, da campía verdecente, do ceo neboento, do curuto hirto, da

choiva miudiña, da campana da aldea, das oliveiras escuras, da vella parede ensilveirada, do recuncho sombrizo da carballeira, da lúa que se pón detrás do pinal... ¡saudade da lareira e do agro, saudade bendita que temos de pedir a Dios que nol-a conserve e acrecente deica ó fin das edades!

Foi por esto, e porque a Saudade camiña de costas e vai para diante mirando para atrás, pol-o que poido decir Castelao, con fondo acerto, que os gallegos témol-a luz da Espranza enriba do pazo ou da chouza en que fomos nados.

Vén de tan fondo esta nosa saudade da Terra que ó deixar os eidos nativos, ó alonxarnos mundo adiante, a Lembranza esvaída e a Espranza sedenta, desxugadas, feridas de mal sin consolo, sin toparse, magoan o corpo que cai murcho e frebento,

com-unha rosa da rexión das neves,
trasposta na terra ardente dos países
de sol bravo. Entón surde a Morriña,
que é a mesma Saudade físicamente
doorosa:

Lonxe da morriña,
Lonxe do meu lar,
¡Qué morriña teño!
¡Qué angustias me dan!

Angustia, anguria de morte, dor tan
sin sosego, que o poeta quere verse
no seu chan, baixo o seu ceo, janque
deitado en ortigas!

* * *

Parexa co-esta saudade do Ermo,
érguese, forte e solene, a saudade da
Raza. A alma gallega, afundida na
Lembranza do tempo vello, tornando ó
frescor das mañáns primaveraes da
risoña mocedade, veu nacer, antre as
brétemas do pasado, a Espranza, co-
mo ningunha ben querida, de recon-

querir o amor da nai Natureza, ledada na súa homildade, deitándose no seu berce, fitando ó sol con ollos de meniño, nunha vida sin cadeas. Non de outro xeito os fillos de Adán, ó lembrarnos do Paraíso perdido, abrimos o corazón ó desejo dun Paraíso futuro, que os crentes ollamos no ceo e os espídos de fe coidan alcontrar na Utopía.

Esta saudade da Raza ditou aquela estrofa de amor fraterno:

á nobre Lusitania
os brazos tende amigos...

A saudade da Raza e a saudade da Terra, entrenzadas, pol-a soia virtude do xuntoiro, pol-a trave das súas arelas, pol-o casamento dos seus soños, enxendran a saudade da Patria, que val o mesmo que saudade de redención. Vén de eiquí que ó recordo do noso pasado céltico, libre e sinxelo no seo da natureza mimosa, más que-

rido por máis lonxano, arelemos con
alma e vida a libertade da nosa Terra.

* * *

Na vigorosa brétema das evocacíós
pondalianas, nos sons maxestosos e
proféticos da súa arpa bárdica, for-
xada nos tempos lonxanos en que
platicaban en rueiro os homes e os
dioses, a saudade tén a inquietude e
o devagar aventureiro que nos deixa-
ron en herdo sagro os nosos loiros
abós prehistóricos.

Mais a aqueles que punza
A fatal lei do canto,
Cal todo o que no mundo
Anda pelegrinando.

Non intentés detel-os vagabundos
Que son aves de paso!

Esas aves que lle dan envexa, esas
aves que, cubizosas do lonxe,

...van en ringleira
gritando e voando,

en demanda das illas Sisargas
seu noto reparo.

Vede con qué fonda piedade crava a
súa ollada serea e vagorosa no destet-
rado sin fortuna que vai pol-o muri-
do en precuro de amparo, n-ese probe
mendicante que atopamos ás veces xa
na vereda reial runxida do sol, xa no
fondo sombrizo da corredoira, n-ese
pelegrino misterioso que estivo en Xe-
rusalém e en Santiago, que conece to-
dol-os camiños e durmeu en todol-os
palleiros, e que sabe eses exemplos
arrepiantes de malos pecados de luxu-
xuria e de sacrilegio que somentes lle
é dado perdoar ó Padre Santo de Ro-
ma. Diante d-eles, a súa voz antiga
tén unha dozura imponente:

¡Parece un pino leixado do vento!
¡Parece botado do mar de Niñóns!

Visión e força, aguia e lión, lendo
craramente no porvir, a súa poesía é
forte e sereamente profética, chea de
fe nos outos destinos da Raza:

A luz virá para a caduca Iberia
dos fillos de Breogán!

E a doce Estramil das terras ber-gantiñáns, deixa ouhir o xurdio canto loitador:

¡Levántate, apréstate,
oh, Celta xentil!
¡O tempo é chegado
do arco brandir!

* * *

Esta vaguedade enfeitizadora, este voar no azul, este ir e vir ô longo da Eternidade, tén carne e hoso en Lamas Carvajal. A nova Galicia, loitadora pol-a súa libertade, vibra n-él forte, rexa e varil. O canto ô Pico-Sagro remata co-esta estrofa valente:

Monte sagro inmortal, o más erguido
de todos cantos tén a nosa terra,
denantes que este pobo sea vencido
volverás a escoitar cantos de guerra!

N-un fermoso soneto, a arela de li-
bertade surde tráxica. Quere a Gali-
cia ceibe,

¡Que mellor é morrer que confundida
Vivir co-a que é pra ti como extranxeira!

No que se laia da morte do Mariscal
Pero Pardo, érguese co-a man pe-
chada:

A sangre do infeliz Pardo de Cela
Crama venganza a Dios pol-a inxusticia,
¡O que a fixo verter tén que bebelá...!

* * *

Curros é unha corda aparte na nosa
lira. Loita por cantar o Porvir ente-
rrando o Pasado; mais, non pode.

A Saudade manda en nós. Temos
de camiñar diante d-ela como as nu-
bes levadas pol-os ventos. Temos de
ir empurrados do amor invencibre c-o
que nos domea. É unha lumia miste-
riosa, de encantamento: nin atados,
como Ullises, poderíamos negarlle a
obedencia.

Vede ô namorado troveiro da «Vir-
xe do Cristal», magoado de lembranza
saudosa.

¿Porqué cando profético levanto
ô porvir os meus ollos tristemente,
fireme o seu remordimento xordo
e dos pasados tempos me recordo?

Él mesmo, leial ô sentimento que
chama âs portas do seu corazón, da-
nos axiña a más nobre das respotas:

Medoña queixa espállase no vento
por cibdades e vilas â redonda,
que inda zoa con tanto sentimento
como na praia cando toupa a onda.
Ese triste queixido, ese lamento
d-alguén vos sai que sofre pena fonda...
¡Ê o pasado que morre! A lira daime
e si canto ese morto perdonai-me.

Mais ese triste queixido, ese lamen-
to, non ê o pasado que morre, non. Ê
él tamén quen o confesa más adiante,
tocado da variña milagreira da divina
Saudade:

Eu d-un tesouro sei que está olvidado
e pra sacalo â luz a terra furo
.....
s-o tempo é sempre o mesmo y-agarrado
vai o presente ô que pasou, seguro...

E vén, de camiño, o reconocimiento

por enteiro da força creadora da saudade da Terra, do poderio do chan natiivo e do seu influxo no moldeamento das almas. N-aquel seu docísmo canto ás belezas da Cruña, relixioso e levantado com-unha profesión de fe, dempóis de decir que non foi na lira de Tirteo sinón sóbor das ondas rizas do Orzán onde deprehendeu a estrofa xurdia e fera da libertade e que os pedrouchos das súas illas lle donaron alma ardente e de firmeza, abre o seu peito saudoso e, arrincada do mesmo corazón, pranta esta rosa de cariño e santidade no xardín da cibda-de amada:

iTi fuches quen me falaches
de estrana maneira mística,
d-este santo amor da patria
que se sente e non se esprica!

A alma gallega do noso Curros vivirá para sempre n-esas catro liñas. A Terra falándolle do amor á Patria de

estrana maneira mística. ¡D-esa estrana maneira mística que é a maneira enxebre a milagrosa da Saudade!

* * *

E chego a un punto no que se me encolle o corazón e o pensamento esváiseme, afundido na grandeza, na immensidade d-un nome.

Para voar astra Rosalía é mester coneceil-os camiños do ceo.

Dempóis de catrocentos anos de silenzo e de recollimento interior, a alma de Galicia, saudosa de amostrar toda a beleza que garda, encarnou n-Ela.

Cando o porvir envolva en néboas os nosos tempos, e as cousas e os nomes se esborrallen na lonxanía, as novas xentes daranse a cavilar que a súa obra, chea de eternidade, é o traballo escollido de centos de corazós arden-do diante do mesmo altar.

O día que a Morte, pousando a gadaña, leu «Follas Novas», soupo de dores que non vira e reparou en que, un por un, lle contaran os hosos.

«Follas Novas» é o poema da Saudade. Con todo, non é un libro pra ler; é un libro para rezar, porque Rosalía esquirbeu más para que Dios a oíra que para que a escoitaran os homes.

Todol-os padecimentos de amor verteron n-él unha pingota de sangre, e alí están, roxas e acesas, como n-un cáliz que gardase o corazón latexante da nosa Terra.

A Saudade, a divina Saudade, foi a que forxou aquel cravo de ouro, de ferro ou de amor, que ô ferir o seu corazón fíxoo frorecer n-aquela rosa mística eternamente louzana:

Mais ve que o meu corazón
é unha rosa de cen follas
y-é cada folla unha pena
que vive apegada n-outra.
Quitas unha, quitas duas,

penas me quedan de abonda;
hoxe dez, mañán corenta,
desfolia que te desfolia...

¡O corazón me arrincaras
desque as arrincaras todas!

A Saudade levouna no seu colo,
tan alto, tan alto, que xa non ve terra;

Xa nin rencor nin desprezo,
xa nin temor de mudanzas;
tan só unha sede... unha sede
d-un non sei qué, que me mata.

A Vida e a Morte abrázanse n-Ela,
suspensas de alcontrarse pechadas no
mesmo camarín.

Mortos e vivos, en xuntanza saudosa,
alentamos n-unha tranquilía e doce
irmundade. O cimiterio, que xa non é
ausencia, tén a quentura do fogar e
n-él xogan os nenños, cantan os pa-
xaros e pratican os canónegos vellos,
sentados ó sol. A terra ridente trun-
fou da Vida e da Morte. A Saudade
levantou os marcos de todol-os lin-
deiros e, ó seu bico amoroso, as al-
mas reencarnaron:

De Galicia os cimiterios
c-os seus alcipreses altos,
c-os seus olivos escuros
y-os seus homildes osarios,
todos de frores cubertos,
frescos com-os nosos campos,
.....
cheos d-un grande sosego
parés que nos dñ: ¡Durmamos!
Dos vivos, amigos sodes,
mortos que ali tēs descanso.
Visitávanos cada día,
falán con vosco rezando,
.....
e ¡astra mañá! se despiden
de vós, para o seu traballo.

Non seguirei. Leia quen poida. Leia
e rece c-os beizos pechados, deixando
que o corazón entrence, c-os raios de
luz sin conto que dormen en cada rima,
a escada do seu camiño de Eterni-
dade.

Diante de Rosalía voan as subrimes
palabras do cántico divino: «Ecce enim
ex hoc beatam me dicent omnes gene-
rationes...»

No ceo e na terra, libres ou escra-

vizados, para sempre, para sempre,
Rosalía é o *corpo-santo* da Saudade
Gallega.

* * *

Finadas estas páxinas homildes, rés-
tame pôr testimonio, obedecendo man-
dados do corazón, da miña gratitudine
ós nobres compañeiros que, alzándo-
me en máis do que eu son, foron ser-
vidos de faguerme a honra e a gracia
d-un asento á súa veira, e, co-eles, ós
fidalgos señores d-esta Casa gallega
de Mondariz que hoxe nos acollen
co-a xentileza e o amor que un morto
esgrevio lles deixou en herdo espi-
tual.

Un soio laio queda no meu peito,
fillo do dor da ausencia do Mestre
grorioso, do que n-este Istituto é ca-
beza visibre e alma dirixente. Cheguen
astra él, co-a miña respetosa reve-

rencia e fonda devoción, en home-naxe de xusticia, estas palabras alleas, pol-a súa pruma lembradas n-unha páxina inmortal: «Fillo de Galicia, endo a súa obra deprendín que tiña lunha Patria».

CONTESTACIÓN
DE
ELADIO RODRÍGUEZ GONZÁLEZ



Quixo a miña boa sorte y-a vosa
mala fertuna que fose a miña homilde
probeza intelectual unha vez más aga-
sallada e favorecida co esta grande e
ennobrecedora mercede de apadriñar
á un novo compañeiro que inda de-
nantes de entrar na nosa Academia,
onde está de cote alcesa a labarada
dos santos amores á canto é noso,
tiña xa andado o estreito e longo ca-
miño da inmortalidade, como alma
privilexada y-escollida que alá *No
Desterro*, nas alonxadas praias da
emigración, sintíuse bicada polos bei-
zos ardentes e fecundos da meiga Poe-
sia gallega, d'esa aloumiñeira deidá
que é expresión de todolos sentimen-

tos fondos, arca santa de todal-as relembranzas íntimas, espello craro e relcente de todol-os escuros heroísmos da raza, fonte gurgulleira da que manan a cachóns, en escumante ferveiro, todol-os recordos vellos que levamos na yalma, eternamente apegada á Terra-Nai, forno onde se amasan e se cocen todal-as nosas ledicias e todal-as nosas tristuras, e hucha recendente da que saen, coma d'un sagrario, todal-as nosas morriñas e todal-as nosas saudades.

* * *

Non é mester abril-as portas pra que o fillo lexítimo das galicianas mussas veña sentarse á carón de nós, e entre á faguerños compaña, pra ser un dos primeiros na relixiosa práutica d'este culto cuáseque eucarístico á todal-as cousas que, por ser nosas,

sonnos tan queridas e mirámolas con tanto agarimo.

Ramón Cabanillas tén abertas de par en par todal-as portas que dan paso ós tempros dos gallegos enxebriismos. Ténas por dereito propio, por méritos d'abondo, por razón mesma dos seus mesmos títulos e das suas obras engaioleiras. Alí onde atope adouración sinceira o santo nome d'esta Terra Santa; onde haxa un altar enteiramente consagrado ás virtudes da nosa raza, y-á Fe nos nosos destinos futuros, alí será Cabanillas un dos más escolleitos, dos más outos oficiantes.

Si él vivira nos vellos tempos pasados, quizáis fose un d'aqueles druidas que eran mestres e señores, que coñecían o fondo do desconñecido e vivían no más escuro e enmarañado das zoantes carballeiras. Veríamolo estoncés envolto na branca túneca, adi-

cado ôs seus ritos misteriosos, coa
fouce d'ouro ô pe da follosa aciñeira,
afaneado en descobrir as sorpresas
da Natureza y-os segredos do Porvir,
e teríamolo pol-o bardo cantor dos
célticos feitios. Porque él sabe de *fouces esquenidas*, e de *sonos dourados*,
e oi no escuro o que rosma a sombra
do pinal barulleiro, coma un rezo
litúrxico de redentoras arelas pátreas,
e entende o que falan entre sí as *tardes de vento y-as noites de choiva*, e
n'esa hora espirtoal do serán, cando
entre lusco e fusco anda pol-os eidos,
caladiñamente, quedíñamente, maini-
ñamente, a silandeira vós do asosego
arrulando o sono dos agros, él vai
camiño adiante, corredoira abaixo,
costeira arriba, amodiño, amodiño, co
seu *carriño cantareiro*, contemprando
a engadante meiguería dos *paisaxes*,
vendo cómo as *follas soltas* teñen ta-
mén as suas íntimas traxedias nos

días d'outono, doéndose da «tristeza dos arbres sin paxaros nin follaxe», ouvindo os salaios das *pombas feridas*, e cantando as *cancións* que inzan os nosos vales de saudosos alalaas, e enchen as nosas aldeas de graleadoras muíñeiras, e desfanse esmorecentes pol-os nosos campos en arrechoucheira eacaloumiñante poesía.

Nos tempos d'hoxe, vividos tan á presa e tan axiña, que as horas parescen anos y-os días asomellan séculos, xa non hai druidas. Os castros, as medorras, as mámoas, os dólmenes y-as pedras abanantes, soio son agora curiosidades prehistóricas pra investigaciós arqueolóxicas, que nos quedan coma recordos de relixións mortas e de esquencidos ritos funerarios, mais sírvennos pra xustificar a nosa ilustre proxenie y-os nosos títulos seculares de raza, d'esta raza sana e varil, dura pr'os traballos, terne nas

virtudes, sofrida e valente coma poucas, forte e leial coma ningunha.

Certo que xa non se escoita a voz do Brenn congregando ós seus vassallos, nin se ven nas cumes dos montes as lumeradas de alarma que prenden en toda a comarca a siñal d'un próximo perigo e piden unha súpeta xuntanza pr'a propia defensa; pero en troques de todo eso temos os novos apóstolos das nosas novas Cruzadas; e como heraldo sagrado e grorioso que anuncia o comprimento das «vellas profecías», tanto tempo agardadas, temos iste gran poeta que é carne palpexante de poesía viva y é corazón acendido en amor á Terra, pra espreguizal-as nosas concencias morriñentas y-espertal-os nosos entusiasmos adormiñados.

Herdeiro por líña dereita d'aquela santa gallega, d'aquela rula milagreira dos *Cantares e das Follas novas*,

que morreu en olor d' inmortalidade e inda vén dende a gloria acariñarnos e enmeigarnos á todos cos seus versos-oracións, anacos de feitizo e de encantamento, o noso poeta tén as nobres e xostregantes indinaciós de Curros Enríquez diante *Da Terra asoballada*; e pón nas suas estrofas barudas os ossiánicos acentos de Pondal, «o da lira celta d'ouro e ferro»; e vai guiado pol-a estrela do Ideal que Alfredo Brañas encolgou no ceo das nosas cobizas, coma un novo Camiño de Santiago; e leva consigo a lostre-gueante e lumiosa ispiración de Alberto García Ferreiro; e lembra as grandezas do mestre Añón; e conecedor coma Xan Manoel Pintos do noso doce lenguaxe tece co él os más repinicados encaixes do falar das fadas; e tén a mimosa dozura de Alberto Camino y-as churrusqueiras picardías de Benito Losada e de Aureliano J.

Pereira; e a voz enxebre da aldea, que poucos souperon recoller coma Valentín Lamas Carvajal e Manoel Leiras Pulpeiro, garda nos seus libros o cheiro arrecendente da terra en lentura e das noites *aluaradas*, d'esas noites tranquilas e solenes en que a voz do Acougo y-as pantasmas do Medo andan cantando a caladiña canción do Silencio por entr'os soutos y-os piñeiros; noites que dan á campía neboeiros de brétemas y-esvaimentos de coores amortuxados, nos que parecen rebulir os trasnos das picareiras tradições aldeanas, fillas do misterio e nais da inxenuidade.

* * *

Un Vento Mareiro nol-o levou,
n'unha d'esas remuiñadas en que se
ven envoltas as almas inquedas que
buscan hourizontes novos e saben e

poden mirar fito a fito ô lonxe; e alá se foi, arrempuxado pol-as nobres ansias de buscar traballo honrado, xa que aquí non tiña más que probeza santa. E alá, *No Desterro*, n'esa forxa onde se cravuñan as armas do más sano galleguismo e do más firme amor ô nativo chau, víuse unxido pol-as sagras maus invisibres da Saudade, que o colleu agarimosa no seu colo, biconuno solermeiríamente con estremecementos virxinales, aquentouno co morno quentor da sua cariña de diosa sin corpo, acochouno moi acochadiño no seu leito d'espiñas e de froles, e fixoo entrar no reino maximario dos ensonos, pra adormentarlle as fondas morriñas que se lle cravaban firentes no pensamento e no corazón, coma si quixesen arrincarlle a y alma e abafarlle os folgos.

E foi entón cando a Morriña que sintiu dentro de sí tomou forma im-

palpabre no seu maxín, encheuse axiña de raiolas de lus buligueira, e n'un esprendoroso estrelecer de alborada trunfante e groriosa saíu pra fôra en escachoantes borbollós de poesía, e voou con voo de aguia, erguéndose hastr'os máis outos cumes da inspiración, e dende alí tivo un himno de gabanza e de alento pr'os modernos loitadores homildes, pr'os nosos irmáns gallegos que «pra redimir seus eidos», van ô conquerimento do traballo e do pan

¡lonxe, ben lonxe, onde o recordo morra,
onde a vista do vello campanario
y-a vós dos fillos non anube a yalma!

E co ese écsodo atafegante que pol-o ermo deserto das desilusiós e dos desenganos emprenden á ducias, á centos, á milleiros, os que foron nados aquí,

a mansa aldea, frábica de escravos,
cobre as baixas do exército dos probes.

Y-estonces é cando él arde en san-

tas caraxes ô contemprar cómo rube
o Calvario o Cristo d'estes tempos,
levando

¡Noite diante dos ollos!
¡Noite no pensamento!
¡As brétemas da Dúvida!
¡Os pantasmas do Medo!

E n'unha das arroutadas d'indina-
ción que sinte ô darse conta d'iste re-
baixante espectáculo en que a besta
humana se ceba carniceira na ovella
humana, cantou

a redención esquencida
y-o dor da Terra ferida...

ferida porque ve que os seus fillos se
lle van á onde Dios queira, deixándo-
lle as campías tristes, as aldeas aban-
donadas, as chouzas desertas, os la-
res fríos, as hortas ermas y-os pior-
nos valdeiros; ferida porque se atopa
aldraxada moitas veces pol-os mes-
mos que debían querela.

¡Sempre nai, sempre Señora,
con leda ou cativa sorte;

preto e lexos; onte, agora,
mañán... na vida e na morte!

* * *

Namorado verdadeiro da Terra, d'esta terra que é imán dos nosos pensamentos todos,

a dos seráns campesinos,
a dos brilantes orballos,
a dos queixumes dos pinos
y-as risadas dos carballos,

rógalle mímoso ô seu carriño que non colla pra chan alleo, que o leve sempre

por onde escoite
a fala doce e sentida
entre bicos deprendida
no colo de miña nai

Y-é que se lembra, sin dúvida, do seu fidalgo e soñador Cambados, que dorme deitado â veira do mar d'Arousa, onde canta ô cair nas brancas cuncas dend'as bicudas xerras,

o espadeiro morno, o roxo viño,
sangue do corazón da nosa terra,

que arrecende a mazáns y-a rosas bravas,
quence os peitos y-as almas alumea,
e sabe á bicos de mocíña nova,
aldeana e trigueira...

viño de sanguíñentas escumas, que
nas tardes de romaxe, no souto, ô pe-
da ermida,

é a yalma do galán de verba maína,
de labrador e de viril maxeza,
que o mesmo se derrete coas rapazas
que arma sin más nin más unha quimeria.

E quer que ese viño amante e doce,
compañeiro das bolas de pan quente
y-as castañas asadas na lareira,
faga un milagre agora que os tempos
son chegados e hai siñales no ceo. E
por eso, pensando no porvir e poñen-
do todolos seus amores no despertar
da raza, dille:

¡Encende os corazós dos apoucados!
¡Prende lume nas almas, viño celta!

porque él, coma fillo de bendición, fixo
voto de seguir pol-a ancha corredoira
do deber, sempre adiante, sin volvelos
ollos atrás, e xurou,

Dereito ou torto,
sin máis alcuno ni achego,
doente ou san, vivo ou morto,
gallego... ¡soio gallego!

Y-así, cabaleiro do renovador Ideal
dos condutores de almas, guiador dos
que ó seu lado imos como simpres
devotíños pra comprir tamén sinceira-
mente, homildosamente, a voluntaria
oferta das nosas insinificancias,
puido pedir que postos todos en pe
«orredor da bandeira de Galicia»

cantémol-o dereito
á libertá da Terra,

«dispostos á non morrer sin loita»,
pra logo, n'un día grande, na hora
das grandes realidades supremas, po-
der berrar alto e forte:

¡A nosa Terra é nosa!

* * *

Vel-ahí porque Ramón Cabanillas
foi dendeis d'os primeiros istantes o

poeta da Terra y-o poeta da Raza;
foino porque leva a poesía na yalma
y-o amor á terra no corazón; e por
eso, porque entrou varilmente pol-a
porta grande no templo da fama, por-
que acupou o altar maor que estaba
valeiro desque Rosalía, Curros e Pon-
dal pasaron á sel-os *Santos da nosa
Terra*, todal-as campanas da crítica
repinicaron á groria, atoleiradas e al-
gueireiras, cheas de ledicia, con una-
nimidade poucas veces igualada, repi-
tindo xubilosas co inmortal Curros:

¡Hosanna ó poeta que trai a boa nova!

E como poeta da Terra e poeta da
Raza—¡non podería ser d'outra ma-
neiral—sintiu todol-os acoramentos
e todol-os acaloumiños da Saudade,
feita Morriña, que é carne da nosa
carne, alma da nosa alma e sangue
do noso sangue, y-é toda a nosa vida
mesma, porque está formada con ana-
cos do Pasado, do Presente e do Por-

vir, y-está devanada no sarillo do
Tempo co novelo mazaroqueiro dos
nosos Recordos e co fío enguedellado
das nosas Espranzas.

* * *

Non é cousa de meterse agora por
entr'os vizosos prantíos que visten de
gala o tarreo da Filoloxía, pra pescu-
dar con más ou menos fertuna si na
palabra Saudade hai ou non hai un
nisquiño de lusitanismo. ¡Qué más
tén!. Escomásí, o Miño, segúin axeita-
da expresión do vello patrucio de to-
dolos nosos herdos literarios e his-
tóricos, non é más que o río dos no-
sos destinos, que nace en Galicia y-en
Galicia morre, e rega coas suas augas
campos irmaus por unha y-outra
veira...

Por eso, decir Saudade ou decir
Morriña é tanto coma decir alma da

nosa raza, nervo do noso pobo lonxe da terra, nudo forte que nos ata ós paternos lares, sombra que vai de cote con nosco, musa compañeira dos nosos tropezos e dos nosos trunfos, das nosas amarguezas e das nosas alegrías.

A Saudade é pra nós coma unha nai agarimosiña e querendosa que tan pronto nos bate como tan pronto nos mima, e si agora nos fire ou nos manca, enseguida nos consola e nos cura agasalleira; e si un momento nos pón cara esquiva e fosca, non sabe cómo comporse pra facernos axiña acaríños acaloumiñantes.

A saudade é pr'os gallegos

enfermedá sin nome
que nos deixa co espírito encolleito...
doenza sin doores que nos calla o sangue,
e nos quita os folgos, e nos tolle os nervos...
proído de cóxegas
que nos escoce o corpo sin querelo...
mal misterioso da raza
que hastra nos abafa nos días acedos...

* * *

Anda sempre a Saudade tan con
nosco y-é tan nosa cando nos vemos
fortemente sacodidos pol-as xurdias
mareiras da emigración, que se dixerá
que quer asulagarnos na lagoa sin
fondo dos pensamentos magoantes ou
que pretende envolvernos nas tépe-
das craridades da soñada felicidá.
Trátase d'un sentimento fondamente
noso, froito dos más grandes amores
espiritoales á Terra, que leva xa moi-
tos séculos de madureiro e deloiro e
que chegou á adequirir cheiro, coor e
sabor, tomando corpo e alma na co-
pra popular que é todo un poema
tenro e saudoso e que canta coma si
fose un salaio de abafante cobizo:

Airiños, airiños, aires,
airiños da miña terra,
airiños, airiños, aires,
airiños, levalme á ela.

¿En qué idioma, en qué lenguaxe hu-

mano haberá un sospiro más salou-
cante, más íntimo, más cheo de do-
zura, más laiante de coitas que ese
cantar dos cantares, ese amor dos
amores que unha alma escura, viaxei-
ra e cautiva, arrincou do seu ser pra
choral-a Saudade y-a Morriña que
levaba dentro de sí roéndolle as en-
tranás?

* * *

Afirman algús escritores de renome
e de sona que a Saudade é soio propia
das razas débeles e dos pobos enfer-
mizos e dexenerados. Pol-o que toca
óis gallegos, semellante afirmación en-
tra na ringuileira das verbas valeiras
de todo senso de realidade e ispidas
de toda vestimenta de verdá compro-
bada.

A Saudade dalle ós gallegos alento
y-esforzo pr'as más admirabres em-

presas. N'ela atopan sempre enerxía e varilidá pra levar á poleiro as máis patrióticas iniciativas; ela fai que na ausencia comulgemos todos na santa comunión da xuntanza das almas; por ela tén acotío culto efeutivo a relixión espirtoal da Terra; d'ela xurden istituciós que son honra e argullo da Raza; ela dá corpo ás maiores proezas y-ôs más grandes heroísmos na segreda loita pol-o aforro, que é loita desesperada de vida ou de morte; gracias sean dadas á ela, ali onde haxa un fato de gallegos amantes dos pátreos eidos, ali está a forza y-alí está o trunfo; o trunfo esprendente dos nossos valementos, mostra baruda das nosas condiciós de masculinidá pra sel-os primeiros en todas partes e pra dar sensación do noso poderío e da nosa forteza nas sociedades esgrevias d'irmandade que na América son escola de enxebre galleguismo e que

non coñecen o esquencemento pra
canto sea doado pra Galicia.

Sería, pois, unha verdadeira inxus-
ticia non atallar o paso d'ese pecado
d'herexía que di que os gallegos so-
mos unha caste débele e dexenerada;
e sería en nós, ó mesmo tempo, unha
vileza sin perdón negar o noso paren-
tesco íntimo coa Morriña y-a nosa
descendencia dereita da Nai-Saudade,
da que somos lexítimos vinculeiros.

Por eso non poderá xamáis chamar-
se poeta gallego o que non seipa es-
presal-a Saudade, o que non-a leve
dentro dos hosos, o que non acerte á
comprendela y-á espricala, o que non-
a sinta bulir rebuldeira pol-as veas,
afervoándolle o sangue.

E por eso nas asoleadas hortas de
regadio que forman o patrimonio poé-
tico da nosa Terra e da nosa Raza hai
criadeira semente de Morriña, que xer-
mola en doces baladas de infinitas va-

guedades que teñen un pouco da mai-
na lus do luar, e hai primaveirales
gromos de Saudade, que frolecen n'un
rechamante desbordamento de coores
e froitifican en sentimentales lirismos
de fondas tristuras que fan sangral-as
almas.

Tiña que ser así, ben o sabe Dios.
O saudosismo dalle de cote á musa
gallega os salmos laiantes e congoxo-
sos das cotianas angurias, como o
vento ll' empresta ás arpas bambean-
tes das carballeiras os musicales mar-
mullos dos enredos das follas cando
palican unhas coas outras nos práce-
dos anoiteceres.

* * *

Nas cordas sonorosas de tod'a lira
céltica xogan e brincan e choran e
troulean todal-as saudades que teñen
nos nosos poetas actuales unha uni-

dade grande dentro da variedade máis
máis esprendorosa.

Védeo. A yalma fortemente gallega de Manoel Lugrís Freire canta as *soidades* que lle lembran a *escravitú* dos seus feiticeiros vales mariñáns, onde a *estadeíña* anda de noite pol-as aldeas preto dos *pazos*; sinte Antonio Noriega Varela, ese gran cantor da solemne maxestá *do ermo*, as sereas saudades da montaña aspérrima; ve-se Gonzalo López Abente collido pol-a saudade das *furnas* da costa brava, pol-a que él vai con fíos de ouro, raio-las de lua e folerpas de neve tecendo as suas poéticas creaciós; doise Enrique Labarta Pose das soedades do *probe gaiteiro de Baio*; leva Xan Barcia Caballero as *brétemas* da saudade nas suas *Rimas*; envolve Antonio Valcárcel a sua saudade íntima nas risas das mozas, que non soen entender os enfermos do espirito; garda Vicente

Risco nos seus *poemas novos* a saudade d'unha pátreia grande que vai camiño da nova Atlántida; crava Alfonso Castelao o seu lápiz-aguillón en nós, fervendo en saudade pol-a cobizada redención do chau; fala o Marqués de Figueroa da saudade *das almas e dos corpos*, cando os éstes se axuntan e aquélas se apartan; colle Euxenio Carré Aldao o carreiro longo da saudade ó verse alumeados polas *raiolas* do amor á terra no *camiño da vida*; pensa Farruco Tettamancy no que foron os castros, os menhires y-as penas abanantes, sintindo a saudade da grandeza do pasado; valeira Xesús San Luís a carraxenta saudade das tirrias nos seus versos *fidalgos*, vendo as falcatrúas que sofren os novos parias do curruncho nativo; recorra Manoel Amor Meilán a vella lenda que chora a saudade do noso meigo *alalaa*; pule Florencio Vaamonde os

seus versos calaicos, coma si sintise a saudade dos crásicos gregos, que estiveron nos nosos eidos e rubiron ó Pindo pra bebel-a ispiración nas augas do Ézaro; pón Victoriano Taibo a saudade do agro gallego e da persoalidade labrega nos seus lumiosos decires mozos que teñen lumeradas de *agarimos e xenreiras*; busca Filomena Dato Muruais a meiciña da sua saudade entr'a paz virxiliana dos *follatos campesiños*; trócase en lostregos d'ispiración a saudade que alumea á Xerardo Alvarez Limeses; énchese Roxelio Civeira de saudade cando lembra os falares inxeniosos e namorisqueiros da nosa mocedá aldeana; prende a saudade na musa de Xavier Montero total-as meiguerías da terra e total-as barudezas da raza; hai un fondo acougo de saudade nos versos de Xaime Quintanilla, feitos idea e feitos pensamento; teñen un deixo

picareiro de saudade as *ventureiras* visiós gallegas de Ricardo Barros Pintos; pónse Roxelio Rodríguez Díaz *diante da porta*, pra recollerse más intimamente na santa saudade do lar e do agro; empréstalle a saudade á Emiliano Balás as engaioladoras mimosidades da nosa fala; pídelle Xan Fernández Merino á saudade os rouscos bruídos do mar do Orzán—o namorado cantor da Cruña—pr'as suas cántigas novas; anda a saudade escorregándose acariñadora, por entr'os saloucos y-as bágoas de Nicolás García Pereira; rezuman saudade as frangullas de Xosé Rei González; consólase Xenaro Mariñas coas lembranzas que a saudade lle dá mentras está desterrado; esbara a saudade en cobizos de *rexurdimento* pol-as poesías de Antonio García Hermida; leva consigo Eduardo Lence Santar e Guitián a saudade das badaladas que

lle recordan os seus tempos de neno; pasa agachadiña a saudade pol-a inspiración de Xosé Cabo Pastor; faise saudade da terra o amor á *Galicia* en Francisco Sánchez García; hai arrolos de saudade nos escomenzos poéticos de Manuel R. Posse; brilan os lostregazos da saudade nas *muxenas* de Amador Montenegro Saavedra; vai Farruco Porto Rei *vida adiante* recollendo a saudade que teñen os contos ouvidos ó pe da lareira nas enchoviscadas noites d'inverno, pra despertar en *Fermosinda* as ansias queimantes dos misteriosos namoramentos; derrete Evaristo Martelo Paumán a saudade nas suas *líricas*, onde rexouban os *afillados do demo*; tén a saudade en Heraclio Pérez Placer as arrechouchadas dos cariños maternos y-os arrepiamientos das impresiós súpetas; afóbase Alfredo Nan de Allariz entre *fume de pallas*, e toma folgo de

saudade nos recordos d'un vello gaitero; renova Galo Salinas Rodríguez a saudade dos vellos tempos coa fazaña histórica da *torre de Peito Burdelo*; anda a saudade de Xan Pla Zubiri facéndolle piedosa compañía á *tola de Cobas*; deixa cair Manoel Lago González un orballo de saudade na hora brincadeira da *alborada* que anuncia o sol da verde Galicia; pousa Bernardo Rodríguez no poio da poesía a agarimosa carga da saudade que trai ó lombo nos amorriñados anos da emigración; debulla Farruco Salgado e López Quiroga en *poemas cortos* a fonda saudade dos seus sinxelos sentires; apesárarse Francisca Herrera Garrido coas saudades que hai nas *sorrisas e bágoas* das *almas de mulles*, que andan á toutiñas no mundo como as *volallas na luz*; énchese de cativas congoxas Aurelio Ribalta coa soidade das campías e dos agros que

lle fan latexar fortemente o corazón; cóbrense de saudade mística as *mágoas* que lle saen da yalma a Frai Samuel Eixán; alcende Lisardo Barreiro o lume das suas estrofas coa saudade que deixa no noso ser a *muller gallega*; atristécese Xosé Iglesias Roura coa saudade que coida ver na *vestal moderna*; fanse pasión as verbas de Antonio Villar Ponte na fogueira de saudade en que parece queimarse a *pátrexa do labrego*; anágase Xosé María Moar en remansos de saudade vendo colgado e esquencido n'un curruncho da cociña o trouleador *pandeiro* que tanto se peneirou en romaxes e foliadas; axunta Salvador Cabeza León todol-os seus cariños na íntima saudade con que agarda o trunfo de Galicia; séntase Xavier Prado, Lameiro, á *carón do lume*, praescoital-as churrusqueiras agudezas aldeanas e encherse de saudade pol-as nosas cos-

tumes vellas; esconde Avelino Rodríguez Elías a saudade no tesouro dos seus versos musicales que chegan ó corazón; métese Ricardo Frade Xiráldez pol-as empetoutadas congostras da saudade, pra ver cómo Xan labrego, coutivo da morriña, vai cara ás terras iñoradas, deixando aquí, nas veigas coneidas, un meigo ben de Dios; recóllese a saudade íntima de Francisco Alvarez Nóvoa na invernda do seu peito, sempre xiado; láiase Xosé Campos Núñez da saudade que sinten os fillos da Suevia que van car' ó desterro; rebule a saudade en Ramón Suárez Pedreira cando pensa nos campos verdescentes da sua patria; sigue Adolfo Mosquera esgurrichando a saudade que inda se garda no xerro das suas vellas lembranzas; alcóntrase Roberto Blanco Torres coa compañía agarímosa da saudade nas horas de morriña que pasa lonxe

dos seus eidos; rube Antonio Rei So-
to hastr'as outuras da ispiración pra
afundirse na saudade do *amor que
vence ó amor*, e chega ó cume do *mos-
teiro de Ribas de Sil*, pra abafarse na
saudade do eterno máis alá que dende
ali enriba se adiviña e se divisa airoso
no ceo, mentras por alá embaixo pasa
o camiño real do progreso, furando
montes, fendendo penedos, atravesan-
do picoutos e sementando fartura e
vida...

A Saudade nos poetas gallegos de
hoxe, así nos poetas consagrados, que
son lus de realidade, coma nos poetas
novos, que teñen alumeos d'espranza-
zas, é o rezo diario dos nosos amores
a canto é noso; é o himno maxestoso
e trunfal dos nosos sentimentos fon-
dos; é a cántiga íntema que vai sempre
con nosco cando nos imos da terra;
é, n'unha palabra, a forza segreda que
nos anima nos nosos traballos e que

nos dí a todas horas, pensando na Terra,

Oremus
Laboremus.

* *

E agora, xa que eu teño que poñer fin a estes doux actos académicos que pra groria de Galicia e pra honra e argullo da Real Academia Galega celebramos n'este Pazo da Saúde, que é laboratorio das almas porque ó mesmo tempo que cura as doenzas físicas tamén precura satisfacel-as necesidades espirtoales, permitídeme que as miñas derradeiras palabras sean un canto de gratitú pra estes irmaus Peinador, que por lei da herencia e do sangue son unha representación viva de engadante simpatía e de compenetración co traballo,

e son ademáis encarnación lexítmica
d' amor á terra.

Pr'os que somos gallegos, e gallegos de corazón, o nome de Peinador tén que merecernos todal-as consideraciós e todal-as gabanzas e hastra todol-os agradecementos. Non solamente tivo a virtú de facer vir á Galicia á moitos que soio sabían de Galicia pol-a sona que de curral de vacas e de frágoa de segadores e de mozos de cordel tiña esta nosa meiga terra, sinón que inda quixo dar probas do seu fondo e sinceiro galleguismo, creando o Museo gallego de Pías, no que hai que entrar coa devoción con que s' entra n'un santuario homilde, n'unha d'esas ermidas pequenñas que s' esconden entr'o prodixio dos nosos campos.

E pra comppretal-a obra d' enxebrismo d'aquel patrucio de verdá, traballador incansable e loitador firme,

que se chamou Don Enrique Peinador Vela e que soupo descobrir pra imprecedeira gloria sua a fonte santa d'este santo milagre de Saúde, o seu fillo D. Enrique Peinador Lines creou aquí o coro *Agarimos da Terra*, que con tanta mestria canta a nosa música popular, alegre unhas veces, tristeira outras, sempre soave e sempre doce, na que rebule tod' a yalma da nosa raza. ¡Quén nos dera en Galicia moitos Peinadores pra trocal-as nossas forzas mortas en forzas vivas!

Por eso n'esta ocasión memorable soio sei decirlle ôs irmaus Peinador: —¡Gracias, moitas gracias! ¡Dios vol-o pague!

ACABOUSE D' IMPRENTAR ESTE LIBRIÑO NOS
TALLERES TIPOGRÁFICOS DO DIARIO

EL NOROESTE,

DA CRUÑA,

O DIA PRIMEIRO DO MES DE SANTOS
DO ANO MCMXX



